



Trebinje, 7. 5. 2026.  
MEDIJIMA

## SAOPĆENJE ZA MEDIJE

### **Nova podstranica o EU finansijskoj pomoći: više od 280 projekata na interaktivnoj mapi**

Direkcija za evropske integracije je, povodom obilježavanja Dana Evrope i Evropske sedmice u Bosni i Hercegovini, u četvrtak 7. maja 2026. godine, u Trebinju predstavila novi digitalni sadržaj na svojoj web stranici posvećen korištenju finansijske pomoći Evropske unije.

Podstranica *Uspješne priče o korištenju finansijske pomoći Evropske unije u Bosni i Hercegovini* donosi interaktivnu mapu s preko 280 projekata teritorijalne saradnje na 350 lokacija koje prikazuju gdje se promjene odvijaju, priče i foto-priče o projektima i ljudima koji stoje iza njih, te infografike koje na jasan način prikazuju rezultate i efekte ovih projekata.

„Ideja za kreiranje ove podstranice nastala je iz dva razloga. Prvi je to što je korištenje finansijske pomoći EU jedna od tema koja najviše zanima naše građane, a drugi su izuzetni rezultati koje naši korisnici ostvaruju u osam programa teritorijalne saradnje. Konkretno, u prošloj finansijskoj perspektivi naši korisnici dobili su na raspolaganje oko 76,5 miliona KM, dok je u aktuelnoj perspektivi taj iznos već premašio 117 miliona KM. Očekujemo da će do kraja ovog ciklusa biti i značajno uvećan, a s obzirom da već sad imamo odobrene nove projekte te da očekujemo dodatne pozive i nova partnerstva.“, izjavila je medijima direktorica Direkcije za evropske integracije Elvira Habota.

Priče obuhvataju različite sektore, a poseban fokus je na iskustvima bh. korisnika koji su kroz realizaciju projekata doprinijeli vidljivim i konkretnim promjenama u svojim zajednicama. Ovo je bila prilika da se iz prve ruke čuju njihova iskustva, a posjeta Muzeju Hercegovine u Trebinju bila je prilika da se i na licu mjesta vide rezultati projekata prekogranične saradnje.

U ovoj fazi na podstranici *Uspješne priče* predstavljeni su projekti teritorijalne saradnje iz tekućeg finansijskog perioda 2021–2027, kao i nekoliko projekata iz prethodnog ciklusa koji na najbolji način oslikavaju koristi za zajednice. Stranica će se kontinuirano nadograđivati i proširivati na druge finansijske periode i programe pomoći EU.

Podstranica je izrađena uz podršku Njemačkog saveznog ministarstva za ekonomsku saradnju i razvoj (BMZ) u okviru projekta "Saradnja javnih institucija za evropske integracije u Bosni i Hercegovini", koji implementira GIZ.

***Pozivamo medije da na svojim internetskim stranicama postavе poveznicu na Uspješne priče o korištenju finansijske pomoći Evropske unije u Bosni i Hercegovini, te time građanima Bosne i Hercegovine dodatno približe proces evropskih integracija. U tu svrhu dijelimo link <https://www.dei.gov.ba/bs/success-stories> i prateći baner.***

Direkcija za evropske integracije